

## DOMENIE XIII «VIE PAL AN»

### Antifone di jentrade Sal 46,2

**B**atêt lis mans, popui de tiere,  
scriulant al Signôr in ligrie.

### Colete

Diu, che midiant de tô gracie  
tu âs volût che o diventassin fîs de lûs,  
danus par plasê di no jessi invuluçâts dal scûr de falsetât  
ma di restâ simpri lusorôs cul sflandôr de veretât.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Sap 1,13-15; 2,23-24

**Par invidie dal diaul la muart e je jentrade tal mont.**

Dal libri de Sapience  
Diu nol à fate la muart  
e nol gjolt pe ruvine di chei che a vivin.  
Lui al à creadis dutis lis robis par che a sedin;  
pe salût a son lis creaturis dal mont,  
in lôr no 'nd è velen di muart  
e lis inferis no regnin su la tiere.  
Che di fat la justizie no mûr mai.  
Propit, Diu al à creât l'om par no che al ledi fraidessût  
e lu à fat sul stamp dal so jessi;  
ma par invidie dal diaul la muart e je jentrade tal mont  
e le stan provant ducj chei che a son siei.  
Peraule di Diu.

### SALM RESPONSORIÂL dal Salm 29

**R.** Ti laudi, Signôr, che tu mi âs liberât.

O ài berlât viers di te, Signôr,  
gno Diu, e tu mi âs vuarît.  
Signôr, tu âs fate tornâ sù des inferis la mê anime,  
tu âs tornât a dâmi la vite  
e no tu mi âs bandonât cun chei che a van te buse. R.

Cjantait al Signôr, vualtris che i sês fedêi;  
al so non sant disêt graciis,  
parcè che dome un lamp e dure la sô fumate  
e il so boncûr par dute une vite.  
Se sore sere si à il cûr che al vai,  
a buinore si scriule di gjonde. R.

Ve dûl di me, Signôr, e scoltimi;  
Signôr, dami tu jutori.  
Tu âs mudât il gno corot in gjonde;  
Signôr, Diu gno, ti laudarei par simpri. R.

### SECONDE LETURE 2 Cor 8,7.9.13-15

**Che la vuestre bondance e judi la miserie dai puars.**

De seconde letare di san Pauli apuestul ai Corints

Fradis, come che si fasês onôr in dut e pardut, te fede e te peraule, te dutrine e in ogni sorte di impegn e tal amôr che us vin insegnât, cussì fasêtsi onôr ancje in cheste opare di caritât. Nol è che us oblei, ma o volarès misurâ la scletece dal vuestri amôr cu la passion che o vês par chei altris. O cognossês la gracie dal Signôr nestri Jesù Crist: di siôr che al jere, si è fat puar par vualtris, par che o diventassis siôrs in gracie de sô puaretât.

No si trate però di fâus patî vualtris par fâ stâ miei chei altris, ma di jessi ducj compagns. In chest moment di cumò, la vuestre bondance e judi la lôr miserie, in mût che si sedi ducj compagns, come che al è scrit: “Chel che al veve cjàpât sù un grum no ’nd à vût di masse e chel che al veve cjàpât sù pôc int veve vonde”.

Peraule di Diu.

**CJANT AL VANZELI Zn 6,63.68**

**R. Aleluia, aleluia.**

Lis tôs peraulis, Signôr, a son spirt e vite.

Dome tu tu âs peraulis di vite eterne.

**R. Aleluia.**

**VANZELI Mc 5,21-43**

**Frute, tal dîs jo: jeve sù!**

Dal vanzeli seont Marc

In chê volte, a pene che Jesù al tornà a passâ sun chê altre rive, si dè dongje ator di lui une grande fole e lui al jere su la rive dal mâr. Al capità un dai sorestants de sinagoghe, di non Jaîr, e a pene che lu viodè si butà denant dai siei pîts e lu preave di cûr disint: «La mê frutute e je pes ultimis. Ven e met lis mans sore di jê, par che si salvi e e vivi». Alore Jesù al lè cun lui e i leve daûr une grande fole che lu stricave di ogni bande.

Alore une femine, che a jerin dodis agns che e pierdeve sanc e e veve paft un disordin par mans di tancj miedis spindint dut ce che e veve cence nissun esit di sorte, anzit lant denantdaûr, a pene che e sintì a fevelâ di Jesù si metè framieç de fole e di daûr i tocjà la vieste. Di fat si jere dite: «Se o rivarai a tocjài ancje dome lis viestis, o sarai salve». A colp la pierdite dal so sanc si suia e jê e sintì intal so cuarp che e jere stade vuaride dal mâl. Ancje Jesù, che si jere inacuarzût a colp che une fuarce e jere jessude di lui, voltantsi viers la fole al domandà: «Cui mi aial tocjadis lis viestis?». I dissepui i rispunderin: «Tu viodis ben la fole che ti strice di ogni bande e tu domandis: Cui mi aial tocjàt?». Ma lui al cjalave ator par viodi la femine che e veve fat chel tant. Alore la femine, spauride e dute trimant, parcè che e saveve ce che i jere capitât, si butà denant dai siei pîts e i contà dute la veretât. Alore lui i disè: «Fie, la tô fede ti à salvade. Va in pâs e sta sane dal to mâl».

Jesù al stave ancjemò fevelant cuant che, de cjase dal sorestant de sinagoghe, al rivà cualchidun che i disè a chest: «Tô fie e je muarte. Parcè lambichistu ancjemò il Mestri?». Ma Jesù, sintût par cumbinazion il discors che a fasevin, i disè al sorestant de sinagoghe: «No sta vè pôre; cîr dome di crodi!». E nol lassà che nissun i les daûrji, fûr di Pieri, Jacum e Zuan, fradi di Jacum. Rivâts in cjase dal sorestant de sinagoghe, al sintì il davuei di chei che a vaivin e si lamentavin a fuart. Alore, jentrât, ur disè: «Parcè fasêso sunsûr e vaîso? La frute no je muarte, ma e duar». Alore lôr a scomençarin a ridilu. Ma lui, dopo di vêju parâts fûr ducj, al cjolè cun se il pari de frute cu la mari e i dissepui e al jentrà là che e jere la frute. Po al cjàpà la man de frute e i disè: «Talitha kumi!», che, voltât, al vûl dî: «Frute, tal dîs jo: jeve sù!». A colp la frute e jevà sù e si metè a cjaminâ. E veve di fat dodis agns. A restarin pe grande maravee. Ma Jesù ur raccomandà cun insistence che nissun nol vignis a savêlu e al ordenà che i dessin alc di mangjâ.

Peraule dal Signôr.

**Su lis ufiertis**

Diu, che tu operis cun fuarce intai tiei misteris,  
fâs, par plasê,  
che la nestre devozion e sedi simpri degne dai tiei sants regâi.  
Par Crist nestri Signôr.

**Antifone a la comunion Sal 102,1**

Benedis, anime mê, il Signôr:  
dut ce che al è in me il so non sant al benedissi.

**O ben: cf. Zn 17,20-21**

Pari, ti prei par lôr, par che a sedin ancje lôr un in nô,  
di mût che il mont al cognossi che tu tu mi âs mandât,  
al dîs il Signôr.

**Daspò de comunion**

Cheste vitime divine ufierte e ricevude  
che nus fasi vivi, Signôr,  
par che, saldâts daprûf di te cuntun amôr che nol cognòs polse,  
o podedin produci un ben che al dure par simpri.  
Par Crist nestri Signôr.